

Parlament discuta paja minimala da 4000 francs

Quatter cussegliers naziunals grischuns s'expriman

DA CLAUDIA CADRUVI / ANR

■ **La discussiun da paja occupa vnavant la politica. Ier ed oz tracta il cussegl naziunal l'iniziativa per pajas minimalas. Lezza pretenda in salari d'almain 22 francs l'ura. Cusseglia naziunala Silva Semadeni (ps) è la suletta dals parlamentarischuns ch'è persuenter.** «En mintga sector da l'economia stuain nus avair pajas che permettian da viver en noss pajais», di Semadeni. Gist il sector da vendita haja dacurt demonstrà ch'i saja pussaivel da pagar dapli. Aldi e Lidl han dauzà lur pajas che correspundian uss a las pretaisas da l'iniziativa. «I dovrà salaris che permettian ina existenza normala.» Quai saja bun per ils impiegads, dentant era per l'economia. Cun dapli daners en la giaglioffa possia la gliued dar ora dapli e las interpresas profiteschian.

La ps ed ils verds èn las sulettas partidas che sustegnan l'iniziativa da l'uniun sindacala. Las partidas burgaisas refusan il project, uschia ch'il cussegl naziunal vegn a recumandar oz in «na» a l'iniziativa. Il pievel dat l'onn proxim ses verdict a l'urna.

Il squitsch da l'exteriur

«L'iniziativa è ina emprova onesta da sustegnair ils flaveli che survegnan mo ina paja pitschna», di cussegl naziunal Hansjörg Hassler (pbd). «L'iniziativa na cuntanscha dentant betg sia finamira.» En concorrenza cun l'exteriur fiss quai ina paja memia auta. Las plazzas indigenas vegnissan anc dapli sut squitsch. Gist il turissem, l'agricultura e la vendita na possian betg sa lubir da pagar a mintga impiegà 4000 francs. Uschia razionalisassan questas branschas la lavur e prestassan il medem cun pli pouca gliued.

La Svizra possedia cun ils contracts

collectiv da lavur (GAV) in bun instrument da fixar pajas en diversas branschas, di Hassler. Per branschas senza GAV, sco per exempel l'agricultura, existian «contracts da lavur normals» che fixeschian las pajas en in chantun.

Gasser: «Manipulaziun contraproductiva»

«La Svizra ha gia uss las pli autas pajas en l'Europa», di cussegl naziunal Josias Gasser (pvl). Ina paja minimala da questa autezza saja ina manipulaziun dal martgà da lavur che haja consequenzas contraproductivas gist per quellas

persunas ch'ins veglia proteger cun l'iniziativa.

Per giuvens da 16 onns na fissi betg bun sch'els gudagnassan senz'auter 4000 francs. Uschia renunziassan blers ad in emprendissadi. En sia atgna interpresa engaschia el mintgatant gliued giuvna che na possia anc betg prestar tant. Uschia hajan questas persunas la chaschun da rimnar experientscha. Talas plazzas temporaras na purschess el probabel betg pli sch'i fiss prescrit ina paja minimala uschè auta, conceda Gasser.

La lavur che quests «praticants»

prestian possia manavel vegnir liquidada dal personal existent.

Tuttina vesa Gasser che l'iniziativa ha era ses avantatgs: «Igl è impurtant da manar la discussiun. Sut squitsch da l'iniziativa han Lidl ed Aldi dauzà lur pajas.»

Brand è cunter tuttas regulaziuns

«La paja è la chausa da contractivas tranter patron e lavurant», di cussegl naziunal Heinz Brand (pps). Il stadi na duai ni limitar las pajas bassas ni las autas. Regulaziuns statalas na portian nagut. I dettia gea adina vias e pussaivladads da guntgir.

Ina paja saja expressiun da la prestaziun e da l'engaschi d'in emploià. Sch'in satgi na gudognia betg tant, lura saja la finamira da survegnir ina meglra paja in motor per prestar dapli. Brand na refusa betg sulet l'iniziativa sindacala, mabain era tuttas mesiras accompagnantas per proteger las pajas en connex cun la libra circulaziun da persunas. Tenor el porta tut quai mo administraziun e controllas che valan pauc e na mainan betg a pajas pli gistas.

Bleras vendidras gudognan miserabel

Passa 300 000 persunas lavuran sco vendidras u vendiders en Svizra. Bunamain 50 000 gudognan damain che 4000 francs il mais. L'Uniun sindacala svizra ha preschentà ier cifras.

Pertutgadas da pajas marschas en la vendita sajan cunzunt las dunnas: 39 000 dunnas survegnian damain che 22 francs l'ura. Tar ils umens sajan quai be 8000. Ils sindicats supponan ch'i sa tractia per part da discriminaziun da paja. Era vendidras cun emprendissadi sajan pertutgadas.

Ils sindicats èn persvadids ch'i fiss pussaivel da pagar meglia. En cuncontrast als salaris bass stettian las facultads da possessurs da fatschentas da vestgadira e da chalzers. La famiglia Bata possedia 3,5 milliardas francs, il possessur da Dosenbach-Ochsner 4,1 milliardas, la famiglia che posseda C&A 12,5 milliardas e la famiglia che posseda Navyboot 1,25 milliardas.



Ils politichers duain savair tge che vegn pajà. Ils sindicats han demonstrà ier avant la chasa federala.

KEYSTONE